

## 每週經課朗誦經文(巴克禮台語漢字)2014/01/26

### 共同經課 - 1

#### 以賽亞書九章一節~四節

1 總是彼個曾受痛苦的地無閣踎佇黑暗。前上帝互西布倫及拿弗他利的地受看輕，後來就互沿海的路，約但的河外，外邦的加利利得著榮光。2 行佇黑暗中的百姓看見大光；倚起佇死蔭的地有光照in。3 你互此個國民多多，亦加添in的歡喜；in佇你的面前歡喜，親像收割的歡喜，親像人分所搶的物彼號的快樂。4 因為伊所背重的軛，及肩頭頂的枋，以及壓制伊者的槌，你攏給伊遏折，親像佇米甸的日一樣。

### 共同經課 - 2

#### 詩篇二十七篇一節，四節~九節

1 [大衛的詩。] 耶和華是我的光，是我的拯救，我欲驚是誰？耶和華是我活命的氣力，我欲驚是誰？4 有一項事，我曾對耶和華求，我猶原致意愛得著；就是一世人倚起耶和華的厝，看伊的榮光，數念伊的殿。5 因為患難的日，伊欲暗靜保護我；佇伊的帳帷內，將我囿佇伊布棚蓋密的所在，舉起我佇石磐頂。6 今我的頭殼得著抬起，卡高佇我四面的對敵。我欲佇伊的布棚獻歡喜的祭；我欲吟詩亦欲唱歌謳唵耶和華。7 耶和華啊，我出聲求叫的時，求你聽；閣求你憐憫我，應我。8 你曾講：恁著欣慕見我的面。彼時我的心對你講：耶和華啊，我欲欣慕見你的面。9 毋通對我掩你的面。毋通受氣來趕你的奴僕，你平素是做我的幫助。救我的上帝啊，毋通放揀我，亦毋通離開我。

### 共同經課 - 3

#### 哥林多前書一章十節~十八節

10 兄弟啊，今我對咱的主耶穌基督的名勸恁議論攏著相同。恁中間莫得有分黨，就是著一心一意，大家相契合。11 我的兄弟啊，是革來氏家內的人曾給我講，恁中間有相爭。12 我的意思是恁逐人有啲講：「我屬保羅」；「我屬亞波羅」；「我屬磯法」；「我屬基督」。13 基督豈有分開嗎？保羅豈替恁釘十字架嗎？抑是恁曾受洗禮歸佇保羅的名嗎？14 感謝上帝，佇基利司布、該猶以外，我未曾給恁一人行洗禮，15 免得人講，恁受洗禮歸佇我的名。16 我也給司提反阿一家的人行洗禮，其餘有給別人行洗禮抑無，我卻袂記得。17 因為基督差我，毋是欲行洗禮是欲傳福音，不在言語的智慧，驚了基督的十字架歸佇空空。18 因為十字架的道理，沈淪的人看做蠢；咱得救的人，看做上帝的權能。

### 共同經課 - 4

#### 馬太福音四章十二節~二十三節

12 耶穌聽見約翰關監，就退去加利利；13 離開拿撒勒，去迦百農倚起。此所在佇海邊，佇西布倫及拉大利的交界。14 是欲應驗早託先知以賽亞所講的，15 講：西布倫的地，拉大利的地，沿海墘的路，約但的河外，外邦的加利利——16 坐佇黑暗的百姓曾看見大光；坐佇死蔭的地有光起來照 in。17 對彼時，耶穌起頭宣傳，講：「恁著反悔，因為天國近啦！」18 耶穌行佇加利利的海墘，看見二個兄弟仔，就是西門叫做彼得及伊的兄弟安得烈，拋網佇海裡；因為是討漁人。19 伊就給 in 講：「來隨我，我欲互恁得著人親像討魚的。」20 in 連鞭離開網，來隨伊。21 對遮進前，閣看見二個兄弟仔，就是西庇太的子雅各及伊的兄弟約翰，及 in 老父西庇太佇船裡啲補網，耶穌招 in，22 in 連鞭離開船，拜別 in 的老父，來隨伊。23 耶穌遍行加利利，佇 in 的會堂教示，宣傳天國的福音，醫好百姓間逐樣的症頭及逐樣的病疼。